

摘藻堂四庫全書薈要

子部

欽定四庫全書叢要

子部

御定書畫譜卷五十

詳校官兵部主事臣雷純



欽定四庫全書薈要卷一萬一千三百八十二

子部

御定佩文齋書畫譜卷五十

畫家傳六

宋一

李成

李成字咸熙本京兆長安人唐末徙家青州

名畫評云營丘人

性曠蕩嗜酒喜吟詩善琴弈畫山水尤工人多傳祕其蹟周樞密使王朴將薦其能會朴卒鬱鬱不得志乾德

中司農卿衛融知陳州聞其名召之成因挈族而往日
以酣飲爲事

宋史李覺傳

成幼屬文能畫山水林木當時稱爲第一開寶中孫四
皓者延四方之士知成妙手不可遽得以書招之成曰
吾儒者粗識去就性愛山水弄筆自適耳豈能奔走豪
士之門與工技同處哉遂不應孫甚銜之遣人往營丘
以厚利啖當塗者卒獲數圖後成舉進士來集於春官
孫卑辭堅召成不得已往之見其數圖驚忿而去章聖

每見成筆必嗟賞之故聲益甚成之爲畫精通造化筆
盡意在埽千里於咫尺寫萬趣於指下峰巒重疊間露
祠墅此爲最佳至於林木稠薄泉流深淺如就真景思
清格老古無其人景祐中成孫宥爲開封尹命相國寺
僧惠明購成之畫倍出金幣歸者如市故成之蹟於今
少有

聖朝名畫評

成畫平遠寒林前所未嘗有氣韻瀟灑煙林清曠筆勢
穎脫墨法精絕高妙入神古今一人真畫家百世師也

雖昔稱王維李思訓之徒亦不可同日而語其後燕文
貴翟院深許道寧輩或僅得一體語全則遠矣

江少虞

皇朝事實類苑

李成所畫山林澤藪平遠險易縈帶曲折飛流危棧斷
橋絕澗水石風雨晦明煙雲雪霧之狀一皆吐其胸中
而寫之筆下凡稱山水者必以成爲古今第一至不名
而曰李營丘焉

宣和畫譜

李成善摹寫山水得意處殆非筆墨所成人欲求者先

爲置酒酒酣落筆煙雲萬狀

揮麈前錄

國初營丘李成畫山水前無古人後河陽郭熙得其遺

法 邵博聞見後錄

李成畫山上亭館及樓塔之類皆仰畫飛簷

夢溪筆談

李營丘惜墨如金

費樞釣磯立談

范寬

范寬名中正字仲立華原人性溫厚有大度故時人目

爲范寬

宣和畫譜云關中人謂性緩爲寬中正居山林不以名著以俚語行故世號范寬山水

間常危坐終日縱目四顧以求其趣雖雪月之際必徘徊凝覽以發思慮學李成筆雖得精妙尚出其下遂對景造意不取繁飾寫山真骨自爲一家故其剛古之勢不犯前輩由是與李成並行宋有天下爲山水者惟中正與成稱絕至今無及之者時人議曰李成之筆近視如千里之遠范寬之筆遠望不離坐外皆所謂造乎神者也然中正好畫冒雪出雲之勢尤有氣骨

聖朝名畫

評

范寬山水業業如恒岱遠山多正而折落有勢晚年用墨太多土石不分本朝自無人出其右溪出深虛水若有聲其作雪山全師世所謂王摩詰

米芾畫史

寬畫山水始師李成又師荆浩山頂好作密林水際作突兀大石既乃歎曰與其師人不若師諸造化乃舍舊習卜居終南太華徧觀奇勝落筆雄偉老硬真得山骨而與關李並馳方駕也

圖繪寶鑑

董源

宣和畫譜作董元

董源字叔達

畫史會要云字北苑

鍾陵人事南唐爲後苑副使善

畫山水水墨類王維著色如李思訓兼工畫牛虎肉肌

豐混毛毳輕浮具足精神脫略凡格

圖畫見聞志

董源工秋嵐遠景多寫江南真山不爲奇峭之筆

夢溪

筆談

董源平淡天真多唐無此品在畢宏上近世神品格高
莫與比也峰巒出沒雲霧顯晦不裝巧趣皆得天真嵐
色鬱蒼枝幹勁挺咸有生意溪橋漁浦洲渚掩映一片

江南也 米芾畫史

董源小山石謂之礬頭山上有雲氣坡脚下多碎石乃金陵山景皴法要滲軟下有沙地用淡墨掃屈曲爲之再用淡墨破 畫史會要

董元多作山石龍水龍雖無以攷按其形似之是否然升降自如出蟄離洞戲珠吟月自有喜怒變態之狀使人可以遐想大抵元畫山水下筆雄偉有嶄絕崢嶸之勢重巒絕壁使人觀而壯之故於龍亦然又作鍾馗氏

尤見思致

宣和畫譜

董源又工人物後主坐碧落宮召馮延巳論事至宮門
逡巡不敢進後主使趣之延巳云有宮娥著青紅錦袍
當門而立未敢竟進使隨共諦視之乃八尺琉璃屏畫
夷光於上蓋源筆也 十國春秋

郭忠恕

郭忠恕字恕先河南洛陽人

見書家傳

善畫所圖屋壁重複

之狀頗極精妙多游王侯公卿家或待以美醞豫張紈

素倚於壁乘興即畫之苟意不欲而固請之必怒而去
得者藏以爲寶

宋史本傳

忠恕善畫屋木林石格非師授郭從義鎮岐下每延止
山亭張素設粉墨於旁經數月忽乘醉就圖之一角作
遠山數峰而已郭氏亦珍惜之岐有富人主官酒酤其
子喜晝日給醇酎設几案絹素及好紙數軸屢以情言
忠恕俄取紙一軸凡數十番首畫一卅角小童持線車
紙窮處作風鳶中引一線長數丈富家子不以爲奇遂

謝絕圖畫見聞志

郭忠恕僑寓安陸郡守求其畫莫能得因以縑屬所館之寺僧時俟其飲酣請之乃令濃爲墨汁悉以潑漬其上亟攜就澗水滌之徐以筆隨其濃淡爲山水之形勢此與封氏聞見所說江南吳生畫同但彼尤怪耳王得臣塵史

郭恕先畫重樓複閣間見疊出善木工料之無一不合

規矩聞見後錄

郭忠恕畫天外數峰略有筆墨使人見而心服者在筆墨之外

孫穀祥野老記聞

王士元

王士元汝南宛丘人父仁壽亦能丹青至士元尤精其藝好讀書爲儒者言有局量鄉里器之與國子博士郭忠恕爲畫友文懿張公奏攝南陽從事

聖朝名畫評

郭忠恕於人物不深留意往往自爲屋木假士元寫人物於中

同上

王士元善畫天廐馬雖駑駘疲劣亦能爲之骨氣高卑
皮毛上下隨筆所定較無差處至銜勒之飾飼秣之所
皆有可觀同上

士元靈襟蕭爽畫法特高人物師周昉山水學關同屋
木類郭忠恕皆造其微圖畫見聞志

士元山水中多以樓閣臺榭院宇橋徑務爲人居處窗
牖間景趣耳之深山大谷煙霞之氣議者以此病之宣

和畫譜

黃居寀

黃居寀字伯鸞荃之子也工畫花竹翎毛默契天真
冥周物理始事孟蜀爲翰林待詔與父荃俱蒙恩遇圖
畫殿庭牆壁宮闈屏障不可勝紀徐光溥嘗獻秋山圖
歌以美之曾於彭州棲真觀壁畫水石一堵自未至西
而畢觀者莫不歎其神速且妙也乾德乙丑歲隨蜀主
至闕下太宗尤加睽遇

名畫評云授翰林待詔朝請大夫寺丞上柱國賜紫金魚袋

供進圖畫恩寵優異仍委之搜訪名蹤銓定品目居寀

狀太湖石尤過乃父

圖畫見聞志

筌居竅畫法爲一時標準較藝者視黃氏體制爲優劣
去取自崔白崔慤吳元瑜既出其格遂大變

宣和畫譜

黃惟亮

黃惟亮筌弟隸翰林圖畫院擅名一時

夢溪筆談

王瓘

王瓘字國器河南洛陽人美風表有才辯少志於畫家
甚窮匱無以資游學北邙山老子廟壁吳生所畫世稱

絕筆焉。瓘多往觀之。雖窮冬積雪。亦無倦意。有爲塵滓

塗漬處。必拂拭磨刮。以尋其跡。由是得其遺法。又能變通不滯。取長舍短。聲譽籍甚。動於四遠。王公大人有得瓘畫者。以爲珍玩。末年石中令以禮召瓘。畫昭報寺廊壁。厚酬金幣。乾德開寶間。無與敵者。虞部武員外宗元亦河南人。每歎曰。觀國器之筆。不知有吳生矣。翰林待詔高克明亦謂人曰。得國器畫。何必吳生。本朝丹青名者。惟瓘爲第一。

聖朝名畫評

王瓘工畫佛道人物深得吳法世謂之小吳生

圖畫見

聞志

王瓘

王瓘京師人工畫佛道人物長寫貌晉末與王仁壽皆爲契丹所掠太祖受禪放還授圖畫院祇候遂使江表潛寫宋齊丘韓熙載林仁肇真稱旨改翰林待詔今定力院太祖御容梁祖真像皆瓘筆也又畫開寶寺文殊閣下天王及景德寺九曜院彌勒下生像最爲奇出

圖

畫見聞志

孫夢卿

孫夢卿鄆州須昌人

宣和畫譜云字輔之東平人

少有精鑒家世豪

右志於圖繪常曰吾所好者吳生耳餘無所取故盡得

其法里中目爲孫脫壁又曰孫吳生與王霑對畫開寶

寺文殊閣下西壁爲西方毗樓勒叉天王像及金槍道

菩薩相 聖朝名畫評

趙元長

圖畫見聞志作趙長元

趙元長字慮善蜀中人通天文仕蜀爲靈臺官亦善丹青凡星宿緯象皆命畫之從昶赴闕下太祖特原之配文思院爲匠人常備禁中之役畫馴雉於御座會五坊人按鷹有離鞫欲舉者上命縱之徑入殿宇以搏畫雉上驚賞久之召元長入圖畫院爲藝學詔畫東太一宮貴神之像元長實督之及命摸寫王齊翰應運國寶羅漢深得其法

聖朝名畫評

石恪

石恪

益州名畫錄云字子專

蜀人性滑稽有口辯工畫佛道人物

始師張南本後筆畫縱逸不專規矩蜀平至闕下嘗被

旨畫相國寺壁授以畫院之職不就堅請還蜀詔許之

圖畫見閬志

石恪攻古體人物數張南本筆法雖豪貴相請少有不
足圖畫之中必有譏諷焉 益州名畫錄

恪性不羈滑稽玩世所以作形相或醜怪奇崛以示變
李廌畫品

趙光輔

趙光輔華原人工畫佛道兼精蕃馬筆鋒勁利名刀頭
燕尾太祖朝爲圖畫院學生故鄉里呼爲趙評事長於
佛畫及人物蕃馬等許昌開元龍興兩寺皆有畫壁浴
室院地獄變尤佳 圖畫見聞志

趙光輔尤善畫蕃馬凡欲爲之必心潛慮密視聽皆斷
方肯草本然後點竄增減求具完備始上縑素故光輔
無一毛之失得者如有至寶古今爲蕃馬者亦可數胡

環得其肉東丹得其骨光輔兼有之至於戲風拽繩吃
草飲水奔走立臥嘶嚙跑蹶瘦壯老嫩駕良疲逸羈繫
疾病之狀莫不精至

聖朝名畫評

高益

高益本契丹涿郡人太祖時來中國初於都市貨藥有
來贖者輒畫鬼神犬馬藉藥與之得者驚異有孫四皓
者廣延藝術之士益往客之爲禮甚厚畫鬼神搜山圖
一本以酬其意歲初復畫鍾馗一軸爲獻孫遽張於賓

館或曰鬼神用力此傷和重益聞之乃睨目奮筆畫一異狀者舉石狻猊以擊厲鬼復張於舊所觀者驚其勁捷握手滴汗嘗於四皓樓上畫卷雲芭蕉京師之人摩肩爭玩孫乃神宗近戚進益前所畫搜山圖上歎賞移刻遂待詔圖畫院勅畫相國寺廊壁會上臨幸見益寫阿育王戰像詔問卿曉兵否對曰臣非知兵者命意至此上善之後畫崇夏寺大殿東西二壁善神雖長於大像但稱其筆凡畫坐神則用意最善

聖朝名畫評

高益亦善畫蕃馬於分數盡得身段肥瘠蹄踠疏數皆取形似尤富氣燄

同上

相國寺舊畫壁乃高益之筆有畫衆工奏樂一堵最有
意人多病擁琵琶者誤撥下絃衆管皆發四字琵琶四
字在正絃此撥乃掩下絃誤也予以爲非誤也蓋管以
發指爲聲琵琶以撥過爲聲此撥掩下絃則聲在上絃
也益之布置尚能如此其心匠可知也

江少虞皇朝事

實類苑

董羽

董羽字仲翔毗陵人吃語不能出故有啞子之目善畫龍魚尤長於海水仕李煜爲待詔寫香花閣幃牀屏并積水圖大見稱譽建康有隋大司空陳仁果廟堂後水一壁至今猶存清涼寺畫海水及有李煜八分題名李肅遠草書時人目爲三絕隨煜歸京於學士院壁爲戲水龍於開寶寺東經藏院壁爲弄珠龍皆爲精筆

聖朝

名畫評

董羽善畫水太宗作端拱樓命羽四壁畫龍水羽極其
精思凡半年而畢羽時爲翰林藝學衣祿意望恩賞太
宗與宮中嬪御登樓皇子尚幼遙見畫筆驚畏呼哭不
敢視亟令圻墁之羽卒不獲賞

江少虞皇朝事實類苑

羽畫水於玉堂北壁洶湧瀾翻望之若臨煙江絕島間
咫尺汗漫莫知其涯涘宋白擊節稱賞賦詩謂回眸陡
覺三山近滿目潛驚六月寒

宣和畫譜

吳進

吳進江南人善畫龍水

圖畫見閩志

吳懷

吳懷江南人善畫龍水其最佳處據孤島憑老木伏平
凌拏怒浪呼雲自蔽有天矯肉飛之勢

聖朝名畫評

厲昭慶

厲昭慶建康豐城人工畫人物事江南爲翰林待詔後

隨李後主至闕下授圖畫院祇候

圖畫見閩志

昭慶攻佛像尤長於觀音凡畫古今人物至於衣紋生

熟亦能分別前輩殆不及每欲揮筆必求虛靜之室無
塵埃處覆其四面止留尺餘始肯命意其專謹如此人
有問者以陸探微去梯之事答之故其筆精色澤久而
如新聖朝名畫評

郝處

郝處江南人工畫佛道鬼神兼長寫貌本一商賈酷好
圖畫因而家產蕩盡惟學畫耳

圖畫見聞志

王曉

王曉泗水人善畫翎毛酷好郭權輝鷄子卒至於妙而精神筋骨尤近於郭

聖朝名畫評

傅文用

傅文用京師人俗以三翁目之每見禽鳥飛立必凝神詳視都忘他好遂精於畫其爲鶉鵲能分四時毛羽頗有黃筌風槩至有誤收者今畫院僚屬嘗議曰傅三翁翎毛渾得生意較其真者如鑑中見之

聖朝名畫評

毋咸之

母咸之江南人善畫雞其毛色明潤瞻視清爽大有生

意聖朝名畫評

夏侯延祐

夏侯延祐字景休蜀中人師黃筌畫翎毛花竹仕孟昶

爲待詔後隨昶至京師得圖畫院藝學

田錫咸平集云延祐宋初翰林

圖畫待詔爲

爲流輩推重

聖朝名畫評

廬州巢縣令

張戡

張戡瓦橋人畫蕃馬居近燕山得胡人形骨之妙盡戎

衣鞍勒之精然則人稱高名馬虧先匠今時爲獨步矣
圖畫見聞志

陳皐

陳皐漢州人長於蕃馬張戡之甥也
圖繪寶鑑

顧大中

顧大中江南人也善畫人物牛馬兼工花竹嘗於南陵
巡捕司舫子臥屏上畫杜牧詩殊有思致見者愛之而
人初不知其名未甚嘉重後爲過客竊去乃更歎息然

其他畫在世者不多 宣和畫譜

湯子昇

湯子昇蜀人畫山水人物頗工志慕高逸多繪方外事
作文簫彩鸞圖鑄鑑圖傳於世至理所寓妙與造化相
參非徒爲丹青而已 宣和畫譜

劉永

劉永京師人工畫山水始師僧德符畫松石後遍求諸
家山水採其所長而倣之及見荆浩之蹟乃知諸家有

所未盡一日復覩關同畫俄歎曰是乃得名至藝者乎
遂捐棄餘學專法關氏果遂升堂馳名當代矣 圖畫見
聞志

祁序

祁序江南人工畫花竹翎毛兼長水牛鬱有高致 圖畫
見聞志

祁序畫牛有戴嵩遺風畫貓近世亦罕有其比 宣和畫
譜

孫可元

孫可元不知何許人善畫吳越間山水筆力雖不至豪放而氣韻高古喜圖高士出入巖居漁隱之趣

宣和畫譜

譜

陸瑾

陸瑾江南人善畫江山風物落筆瀟灑殊無塵埃布置物像無不精確可以追蹤名手

宣和畫譜

王凝

王凝不知何許人爲畫院待詔工畫花竹翎毛下筆有法頗得生意又工爲鸚鵡及獅貓等

宣和畫譜

朱義

朱義江南人以畫牛得名作斜陽芳草牧笛孤吹村落荒閑之景無朝市奔逐之趣雖望戴嵩爲不及亦後來之名家也

宣和畫譜

朱瑩

朱瑩與朱義同族善畫人物牛馬得名畫牧牛尤極其

妙宣和畫譜

甄慧

甄慧睢陽人善畫佛像帝釋脫略世間形似具天人威儀故以此得名於時亦工牛馬而留意甚精

宣和畫譜

劉夢松

劉夢松江南人善畫水墨翎毛及草木花竹等亦精於

墨竹

聖朝名畫評

夢松善以水墨作花鳥於淺深之間分顏色輕重雖彩

繪無以加自成一種氣格又作紉竹圖甚精緻宣和畫譜

劉文惠

劉文惠不知何處人善畫翎毛花竹京師人貴之至攜金玉換而不得者故四方少見聖朝名畫評

李符

李符襄陽人工畫花竹翎毛髣髴黃體而丹青雅淡別是一種風格圖畫見聞志

李懷衮

李懷衮蜀郡人工畫花竹翎毛學黃氏與夏侯延祐不相上下圖畫見聞志

李懷衮亦善山水又能爲水石翎毛其常所居及寢處皆置筆雖夜中酒醒睡覺得意時急起畫於地或被上遲明模寫之則優於平居所爲也

東齋記事

張鈐

張鈐幽國人一名翼善畫蕃馬及人物皆師趙光輔其

運筆落墨有刀頭燕尾之狀深得其法 聖朝名畫評

楊斐

宣和畫譜
作楊斐

楊斐京師人性不拘有氣槩多游江浙間後居畫院攻畫佛像宗吳生筆於泗州普光王寺畫鬼神於方丈其容色威勢有足觀者 聖朝名畫評

楊丹

楊丹洛陽處士善寫像 王禹偁小畜集

包貴

包貴宣城人善畫虎名聞四遠世號老包也

圖畫見聞

志

包鼎

包鼎

金貴云貴子

世以畫虎名家而鼎最妙今子孫猶以畫

虎爲業而曾不得其彷彿

歸田錄

辛成

辛成不知何處人籍隸軍中攻畫虎有精神氣骨當時
許其得威厲之勢都下時復有之

聖朝名畫評

馮進成

馮進成江南人工畫犬兔思慮精巧故於寫物能全其

精神尤善染澤

聖朝名畫評

丘士元

丘士元不知何許人工畫水牛精神形似外特有意趣

圖畫見聞志

李茂

李茂不知何許人善畫人物清麗可愛

圖繪寶鑑

王延嗣

王延嗣國初工鬼神

圖繪寶鑑

申屠亨

申屠亨畫山水宗黃筌

圖繪寶鑑

曹訪

曹訪畫柳塘家鶯學徐熙

圖繪寶鑑

陳文頊

陳文頊泉州仙遊人歸朝爲登州刺史改舒州頗知書

亦工畫

宋史漳泉陳氏世家

李穆

李穆字孟雍開封府武陽人

見書家傳

工畫

宋史本傳

素仁厚

素仁厚蜀人早師李文才乾德中至闕下未久還蜀因

求得前賢畫樣十餘本持歸平居以畫自適終老鄉間

蜀川亦有遺蹟

圖畫見聞志

顧洪祝

顧洪祝不知何許人工畫人物

畫史會要

王崇

王崇

與李成同時

李成看碑圖成畫樹石王崇畫人物

周密

雲煙過眼錄

錢昱

錢昱字就之吳越忠獻王佐長子

見書傳聰敏能覆棋工

琴畫

宋史吳越世家

錢昆

錢昆字裕之吳越王俶之子歸朝仕至祕書監自畫寒蘆沙鳥於紈扇人競寶之

陳善杭州志

錢仁熙

錢仁熙武肅諸孫頗讀書善丹青尤工水牛多寫於紈扇上歸朝歷信泰光三州悴

陳善杭州志

錢易

錢易字希白仕至翰林瀑直

見書家傳

自畫十六羅漢極古

怪

陳善杭州志

錢鐸

錢鐸字輔軒武肅第五子善丹青

陳善杭州志

林逋

林逋字君復杭州錢塘人

見書賜謚和靖處士家傳

宋史本

傳

處士林逋居杭州西湖之孤山工書畫善爲詩

歸田錄

和靖亦善繪事

陳繼儒妮古錄

徐崇嗣 徐崇勲

徐崇嗣崇勲者熙之孫也善畫草蟲時果花木蠶繭之類尤喜爲連樹及墜地棗備得形似無有及者士大夫謂二徐有祖之風

聖朝名畫評

崇嗣初造新意不華不墨卷直疊色清涼號沒骨花夢

溪筆談

徐崇矩

徐崇矩熙之孫也崇嗣崇勲其季孟焉熙畫花木禽魚蟬蝶蔬果之屬極奮造化之妙一時從學者莫能窺其

藩而崇矩兄弟遂能不墜作士女益工曲眉豐臉蓋寫
花蝶之餘思也

宣和畫譜

唐宿 唐忠祚

唐宿唐忠祚皆希雅之孫也善畫翎毛花竹俱有能格
京師貴人家多有之

聖朝名畫評

燕文貴

圖畫見聞志作燕
貴畫繼作燕文季

燕文貴吳興人隸軍中善畫山水及人物初師河東郝
惠太宗朝駕舟來京師多畫山水人物貨於天門之道

待詔高益見而驚之遂售數番輒聞於上且曰臣奉詔
寫相國寺壁其間樹石非文貴不能成也上亦賞其精
筆遂詔入圖畫院端拱中勅畫臣面進紈扇上覽文貴
者甚悅嘗畫七夕夜市圖狀其浩穰之所至爲精備富
商高氏家有文貴畫船舶渡海像一本大不盈尺舟如
葉人如麥而檣帆棹櫓指呼奮踴盡得情狀至於風波
浩蕩島嶼相望蛟蜃雜出咫尺千里何其妙也於山水
不師古人自成一家而景物萬變觀者如真臨焉畫流

至今稱曰燕家景致

聖朝名畫評

高文進

高文進從遇之子工畫佛道曹吳兼備乾德乙丑歲蜀平至闕下太宗在潛邸多訪求名藝文進往依焉後授翰林待詔未幾重修大相國寺命文進倣高益舊本畫行廊變相及太一宮壽寧觀啓聖院暨開寶塔下諸功德牆壁率皆稱旨又勅令民間圖畫繼蒙恩獎

圖

畫見聞志

國初高益名大高待詔文進名小高待詔今爲翰林畫
工之宗小高落筆高妙名不虛得也

山谷集

高懷節

高懷節文進長子太宗朝爲翰林待詔頗有父風嘗與
其父同畫相國寺壁兼長屋木爲人稱愛也

圖畫見聞
志

高懷寶

高懷寶懷節之弟工畫花竹翎毛草蟲蔬果頗臻精妙

與兄懷節同時入仕爲圖畫院祇候

圖畫見聞志

王道真

王道真字幹叔新繁人善丹青太宗朝待詔高文進甚有聲望上問誰如卿者文進曰新繁人王道真出臣上遂召入圖畫院爲祇候與文進等傳移相國寺高益畫壁及於大殿西偏門南面東壁畫寶誌化十二面觀音相又與文進對畫寺庭北門東面大神遷待詔及同文進計度玉清昭應宮壁當時稱之

聖朝名畫評

道真亦善畫魚得楊輝之奧祥符中寫金魚一軸獻丁
朱崖甚見稱賞亦能畫盤車嘗爲惠子五車書圖及挽
糧濟水圖皆爲精備同上

道真工畫佛道人物兼長屋木圖畫見聞志

李用及 李象坤

李用及名畫評云京師人李象坤並工畫佛道人馬尤精鬼神

嘗與高文進王道真同畫相國寺壁並爲良手圖畫見

聞志

李用及能畫天廐馬深得韓幹筆法爲病馬尤有功古
未有也畫鬼神體格雄贍筋力魁壯旣無所羈束又不
專詭怪獨宗吳生之筆曾畫相國寺壁至今稱之 聖朝
名畫評

孫知微

孫知微字太古彭山人一云眉陽人通論語老氏學尤
善雜畫師沙門令宗凡牧伯所至必與之相款高談劇
辯皆出人意蜀中寺觀多有親筆畫釋老則往山墅不

茹葷經時方成晚居青城白侯壩之趙邨愛其水竹深茂以助逸興

聖朝名畫評

馬公知節子元知成都酷嗜圖畫蜀有高士孫知微以畫得名然實非畫師也公欲見之而不可得知微與壽寧院僧善一日於其閣上畫惠遠送陸道士藥山見李胥之二壁僧密以告公公徑往從之知微不得已擲筆而下不復終畫公不一爲忤禮之益厚知微亦愧其意作蜀江出山圖侯其罷去追至劍門贈之

蘇稽樂城遺

言

李廌云知微華陽真人有尊行寓意於畫隱者也筆墨
神妙度越衆人乖崖公鎮蜀雅聞其名欲一見之終不
可致聞在僧舍飲亟損車騎却鳴騶往詣之即投筆遁
去及乖崖還朝道出劔關逢一村童持知微書負一篋
迎道左曰公所喜者畫也今以二圖爲獻問知微所在
則曰適一山人以書授我信去已遠矣張公益歎其高
蜀中畫苑

蜀人重孫知微畫筆東坡獨曰工匠手耳

聞見後錄

趙雲子

趙雲子善畫道像於青城丈人觀畫諸仙奇絕孫太古
嘗陰使人問已畫趙云孫畫雖善而傷豐滿乏清秀氣
孫由是感悟

圖畫見聞志

趙雲子畫筆略到而意已具工者不能然託於樵陋以
戲侮來者此柳下惠之不恭東方朔之玩世滑稽之雄
乎

東坡集

童仁益

童仁益蜀中人工畫人物尊像出自天資不由師授乃
孫知微之亞嘗畫青城山丈人觀諸仙淳化末以成都
天慶觀仙遊閣下舊有石恪畫左右龍虎君仁益遂抒
思援豪於天慶觀前亦畫龍虎君兩壁及畫大慈寺中
佛殿漢孝明帝摩騰竺法三藏保福院畫首楞嚴二十
五觀筆力尤健頗有圖軸傳於輦下好事者往往誤評
爲知微之筆也

圖畫見聞志

牟谷

牟谷

名畫評云
字子冲

不知何許人工相術善傳寫太宗朝為圖

畫院祇候端拱初詔令隨使者往交趾寫安南王黎桓
并諸陪臣真像留止數年既還居閭闔門外久之真宗
幸建隆觀谷乃以所寫太宗正面御容張於戶內上見
之勅中使收赴行在詰其所由谷具以實對上命釋之
時太宗御容已令元霽寫畢乃更令谷寫正面御容尋
授翰林待詔能寫正面惟谷一人

圖畫見聞志

李雄

李雄北海人略有藝文尤好丹青之學太宗時祇候於
圖畫院上一日徧詔籍在院中者出紈扇令各進所畫
雄曰臣之技不精於此所學者不過鬼神雖三五十尺
亦能爲之上怒索劒欲誅雄亦無屈意俄得釋去後遁
還鄉曲

聖朝名畫評

陸文通

陸文通江南人畫山水道釋樓臺得名於時山水學董

元巨然畫道釋尤工宣和畫譜

侯翼

名畫評作侯翌

侯翼

名畫評云字子冲

安定人工畫佛道人物夙振吳風窮乎

奧旨長安雒汭寺壁尤多兼有三教聖像故事人物等傳於世圖畫見聞志

陶裔

陶裔京兆鄠人幼警悟多巧思隸後苑造作所爲匠者組織珠翠爲副珈步搖花釵瓔珞之飾及結花鈿爲羽

仙儀仗太宗嘉賞之且曰以此意移於丹青安知無後
世名裔感上言潛志營學遂得祇候於圖畫院精於寫
生召入畫御座宸屏極其精神兩歲方畢又畫大殿十
二幅屏多作祝壽之意遷待詔裔筆法與黃筌相近故
時人語曰西蜀黃筌東京陶裔

聖朝名畫評

蔡潤

蔡潤建康人善畫舟船及江河水勢隨李煜赴朝籍爲
八作司赤白匠太宗嘗覽潤舟車圖因問畫者名氏左

右進曰八作匠人蔡潤筆也上亦悟曰首江南歸命者
邪遽詔入圖畫院爲待詔勅畫楚襄王遊江圖尤爲精
備上嗟異久之聖朝名畫評

孫白

孫白畫水初意作潭泊浚原平波細流停爲激濫引爲
決泄盡出前人意外別爲新規勝槩不假山石爲激躍
而自成迅流不借灘瀨爲湍濺而自成衝決使夫縈紆
曲直隨流蕩漾自然長文細絡有序不亂此真水也廣

川畫跋

丁謂

丁謂字謂之更字公言蘇州長洲人淳化二年登進士
甲科累官平章事封晉國公謂機敏過人文字累數十
百言一覽輒誦善談笑尤喜爲詩至於圖畫博奕音律
無不洞曉

宋史本傳

邢敦

邢敦字君雅家雍丘耽玩經史工繪畫里中號邢夫子

眞宗幸亳詔敦許州助教敦讓不受

宋史本傳

杜衍

杜衍字世昌越州山陰人

見書家傳

官至集賢殿大學士太

子太傅封祁國公謚正獻

宋史本傳

公自少好學工書畫

歐陽文忠公集

王曾

王曾字孝先青州益都人

見書家傳

仁宗時爲右僕射同門

下侍郎平章事謚文正

宋史本傳

王文正書畫皆合格

畫史會要

李端懿

李端懿字元伯開封人

見書官鎮潼軍節度使喜爲詩

工書畫

歐陽文忠公集

屈鼎

屈鼎京師人仁宗朝爲圖畫院祇候工畫山水得燕貴之髣髴圖畫見聞志

泰人有屈鼎者乃許道寧之師善分布澗谷間見屈曲

之狀然有筆而無思致林木皆晦靄而已道寧氣格似過之學不及也

東坡集

許道寧

許道寧河間人學李成畫山水林木初市藥於端門前人
有贖者必畫樹石兼與之無不稱其精妙由此有聲
遂遊公卿之門多見禮待相國張文懿公令道寧畫其
居壁及屏風等文懿深加賞愛作歌贈之道寧所長者
三一林木二平遠三野水皆造其妙而又命意狂逸自

成一家 聖朝名畫評

道寧學李光丞始尚矜謹老年唯以筆畫簡快爲已任
故峰巒峭拔林木勁硬別成一家體張文懿贈詩曰李
成謝世范寬死唯有長安許道寧非過言也 圖畫見聞

志

李宗成

李宗成廊時人工畫山水寒林學李成破墨潤媚取象
幽奇林麓江皐尤爲盡善 圖畫見聞志

翟院深

翟院深營丘人名隸樂工善擊鼓師鄉人李成畫山水喜爲峰巒之景時人議得李成之畫者三人許道寧得成之氣李成得成之形院深得成之風後成孫宥爲開封尹日購其祖畫多誤售院深之筆

聖朝名畫評

翟院深營丘伶人師李成山水頗得其體一日府晏張樂院深擊鼓爲節忽停搥仰望鼓聲不續左右驚愕太守召問之對曰適樂作次有孤雲橫飛淡行可愛意欲

圖寫凝思久之不知鼓聲之失節也太守笑而釋之江
少虞皇朝事實類苑

武宗元

武宗元

圖畫見聞志云初名宗道

字總之河南白波人世業儒父道

與丞相文惠公爲布衣交將宗元詣之時方成童大被
稱賞文惠妻以外孫用其廕得太廟齋郎年十七文惠
請畫北邙山老子廟壁頗爲精絕景德末章聖營玉清
昭應宮募天下畫流逾三千數中程者不減百人分爲

二部宗元爲左部之長丁朱崖爲宮使語僚佐曰適見
靡旗亂轍者悉爲宗元所逐矣中嶽天封觀置百金以
求名手宗元乘興揮寫無毫髮遺恨洛中南宮三聖宮
東壁畫十太一皆丈餘又於河南廣福院寫迴廊壁今
並存焉宗元亦不常奮筆雖貴人名臣日走於門求之
甚勤未嘗肯諾京師富商高生有畫癖常刺拜於庭下
迨十餘年欲得水月觀音一軸宗元許之又三年方成
攜詣高生生已殂矣焚畫垂泣而去丞相文懿張公生

辰宗元獻消災菩薩二軸公張於千歲堂甚祕重焉歷
官至虞部員外郎

聖朝名畫評

武宗元比部學吳道子畫佛菩薩鬼神得其髣髴樂城
集

王兼濟

王兼濟西京洛陽人簡傲嗜酒不修人事學吳生爲畫
得其餘趣武宗元長於大像當世稱絕兼濟嘗與對手
同於本京南三聖殿畫太一兼濟乃西壁焉中嶽天封

觀西壁聖帝入隊亦兼濟筆 聖朝名畫評

王拙

王拙字守拙河東人大中祥符初營玉清昭應宮募天下畫流拙爲右部第一人與宗元爲對時人多許之乃畫本宮五百靈宮衆天女朝元等壁 聖朝名畫評

王居正

王居正拙之子也俗以其小字多呼爲憨哥學丹青有父風師周昉士女略得其妙嘗於苑圃寺觀衆遊之處

必據高隙以觀士女格態凡欲命筆則澄祕思慮故於
形似爲得

聖朝名畫評

孫懷說

孫懷說安定靈臺人任俠不事產業喜丹青學吳生略
得其奧乘興命筆往往稱絕多爲好事者取去故人間
少見其本

聖朝名畫評

文同題孫懷說紙本亂石云孫老抱奇筆臨紙恣揮灑
從頭掃亂石磔磔隨墨下焦頑與圓潤無一不精者誰

信萬鈞重卷之不盈把

丹淵集

高元亨

高元亨字彥德京師人一名懷寶端愿拘禮法嘗褻衣
大帶引奚奴行人以儒者視之真廟時爲圖畫院祇候
嘗畫從駕兩軍角抵戲場圖寫其觀者四合如堵坐立
翹企攀扶俯仰及富貴貧賤老幼長少緇黃技術外夷
之人莫不備具至有爭怒解挽千變萬狀求真盡得古
未有也

聖朝名畫評

元亨工畫佛道人物兼長屋木

圖畫見聞志

楊肱

楊肱京師人後家泗上工畫佛道人物尤於觀音得名天下然而手足間時或小失停分蓋於骨法用筆跨邁倫等是其小疵不足以累大醇亦愛畫波斯妙得其旨

圖畫見聞志

楊圭

楊圭肱子有父風

圖畫見聞志

南簡

南簡平涼人性簡傲不肯從親舊遊閉門獨居以畫自樂太宗朝待詔高元亨奉使過渭川覩簡畫得其名氏遽召之盡禮相遇因求簡筆簡遂披紙運思揮染如埽窮百番無相犯者元亨益重之

聖朝名畫評

劉文通

劉文通京師人善畫樓臺屋木真宗時入圖畫院爲藝學大中祥符初上將營玉清昭應宮勅文通先立小樣

圖然後成葺丁朱崖命移寫道士呂拙鬱羅蕭臺仍加
飛閣於上以待風雨畫畢下匠氏爲準謂之七賢閣者
是也

聖朝名畫評

趙昌

趙昌劔南人性傲易雖遇強勢亦不肯下之游巴蜀梓
遂間善畫花果初師滕昌祐後過其藝時州伯郡牧爭
求筆迹昌不肯輕與故得者以爲珍玩大中祥符中丁
朱崖奉白金五百爲壽昌感其意親往謝之朱崖延於

東閣求畫生菜數窠及爛瓜生果等命筆遽成而去晚年還蜀尤有聲譽多出金購其舊畫以自祕有門生王友亦知名

聖朝名畫評

趙昌善畫花每晨朝露下時遶闌檻諦玩手中調彩色寫之自號寫生趙昌人謂趙昌畫染成不布采色驗之者以手捫摸不爲采色所隱乃真趙昌畫也其爲生菜折枝果尤妙

江少虞皇朝事實類苑

趙昌花寫生逼真時未有其比

歸田錄

王友

一作王有

王友字仲益蜀人師趙昌畫花不由筆墨專尚設色得其芳豔今豪貴家得友之筆往往目爲趙昌

聖朝名畫

評

王有者漢州卒也州將每令趙昌畫則遣有服事供應久之其畫遂亞於昌其爲人亦清潔有巧思非卒之流輩也

東齋記事

鐔宏

鐔宏成都人工畫花果復師王友初云齒教後即肩隨
矣圖畫見聞志

易元吉

易元吉字慶之長沙人靈機深敏畫製優長花鳥蜂蟬
動臻精奧始以花果專門及見趙昌之蹟乃歎服焉後
志欲以古人所未到者馳其名遂寫獐猿嘗遊荆湖間
入萬守山百餘里以覘猿狖獐鹿之屬逮諸林石景物
一一心傳足記得天性野逸之姿寓宿山家動經累月

其欣愛勤篤如此又嘗於長沙所居舍後疏鑿池沼間
以亂石叢花疎篁折葦其間多蓄諸水禽每穴牕伺其
動靜遊息之態以資畫筆之妙治平甲辰歲景靈宮建
孝嚴殿乃召元吉畫迎釐齋殿御宸其中廟畫太湖石
仍寫都下有名鶻鵠及雉中名花其兩側廟畫孔雀又
於神遊之小屏畫牙獐皆極其思

圖畫見聞志

易元吉徐熙後一人而已善畫草木葉心翎毛如唐徐
後無人繼世但以獐猿稱可歎或云畫孝嚴殿壁畫院

人妒其能只令畫獐猿竟爲人鳩

米芾畫史

龍章

龍章字公綯京兆人善畫虎兔亦攻佛道及冕服等尤長於裝染祥符中玉清昭應宮成召令彩繪列壁外有玉皇尊像猶未裝飾畫院僚屬爭先創意至於團斜斜枝莫不詳畫主者中貴人劉承珪曰天帝法服豈如是邪命檢尋道藏及真境錄無有曉其儀者上不懌宮使丁朱崖置賞募工章應之曰京兆府長洛鄉北樂村古

太華觀有玉皇像乃唐人楊惠塑被九色螭羅帔可為
法丁朱崖聞於天子遣使驗之如章言由是得裝其像
工畢乞還田里復本戶租賦久之不報詔入圖畫院非
其好也嘗游食於京師時樂遊坊市藥人楊氏鎖活虎
於肆章熟視之命筆成於一揮識者驚賞之平生所畫
止有六虎

聖朝名畫評

龍顯

龍顯章子有父風

圖繪寶鑑

張昉

張昉字升卿汝南人學吳生得其法大中祥符中玉清
昭應宮成召昉畫三清殿天女奏音樂像昉不假朽畫
奮筆立就皆丈餘高於本郡開元寺畫護法善神最爲
精緻

聖朝名畫評

馮清

馮清閬鄉人真宗時入圖畫院所居城南相近逆旅多
橐駝清常遇之雖身務所迫必引視不已求其情狀然

後命筆遂致聲譽

聖朝名畫評

景靈宮北廊牆壁道經變相乃清之筆

圖畫見聞志

李隱

李隱五原人工畫山水大中祥符末營會靈觀命隱寫
五嶽山形於壁及畫山水於五殿屏扆觀其危峰疊嶂
遠水疎林可謂盡美矣然而鈎描筆槍淡墨焦斯爲未
至爾

圖畫見聞志

龐崇穆

龐崇穆字季和右北平人大中祥符初營玉清昭應宮
召入畫山水列壁而林巒草竹溪谷磴道莫不精備又
於空穴間作游雲直上之狀爲風所駕卷舒聚散其勢
不拘詔入圖畫院崇穆不就而去

聖朝名畫評

荀信

荀信江南人真廟時爲翰林待詔攻畫龍水天禧中會
靈觀凝祥池御座殿宸上寫吐霧龍蟠伏蹲據波濤奇
湧使人驚賞移入禁中

聖朝名畫評

卑顯

卑顯不知何許人真宗朝翰林待詔畫馬有韓幹之風而筆力勁健

圖畫見聞志

曹仁希

圖畫見聞志作曹仁熙

曹仁希字企之毗陵人善畫水無與敵者凡爲驚濤怒浪萬流曲折以至輕波細溜於一筆自分淺深之勢以爲佳爾

聖朝名畫評

曹仁熙水今古無及四幅圖內中心一筆長丈餘自此

分去高郵有水壁院 米芾畫史

戚文秀

戚文秀工畫水筆力調暢畫清濟灌河圖中有一筆長五丈自邊際起通貫於波浪之間與衆毫不失次序圖畫見聞志

劉常

劉常金陵人畫花木名重江左家治園圃手植花竹日遊息其間每得意輒索紙落筆遂與造物爲友染色不

以丹鉛襯傳調勻深淺一染而就

宣和畫譜

劉常花氣格清秀有生意固在趙昌王友上

米芾畫史

燕肅

燕肅字穆之其先燕薊人徙家曹南位龍圖閣直學士
以尚書禮部侍郎致政文學治行外尤善畫山水寒林
澄懷味象應會感神蹈摩詰之遐蹤逼咸熙之懿範太
常寺有所畫屏風玉堂刑部景寧坊居第暨許雒佛寺
中皆有畫壁康定元年贈太尉

圖畫見聞志

燕公之筆渾然天成粲然日新已離畫工之度數而得詩人之清麗也

東坡集

燕肅始作生竹超然免於流俗文同遂能極其變態山谷集

劉永年

劉永年字君錫

宣和畫譜作公錫

章獻明肅皇后之姪也才敏

有神力兼於畫筆錯總萬類非常格可擬官深州防禦

使

宣和畫譜云贈崇信軍節度使謚莊恪圖畫見聞志

永年丹青之學皆出人意表作鳥獸蟲魚尤工道釋人物得貫休之奇逸用筆非畫家纖豪細管得意處雖墜帚可用此畫史所不能及也

宣和畫譜

高克明

高克明絳州人喜幽默多行郊野間覽山林之趣箕坐終日歸則求靜室以居沉屏思慮神遊物外景造筆下景德中游京師大中祥符中入圖畫院與太原王端上谷燕文貴潁川陳用志爲畫友上嘗詔入便殿命畫圖

壁遷至待詔守少府監主簿賜紫景祐初上命畫臣鮑國資畫四時景於彰聖閣國資戰懼不已不能下筆詔克明代之淮海富商陳永以百千求春龍起蟄圖克明堅讓不從時輩多之克明亦善佛道人馬花竹翎毛禽蟲畜獸鬼神屋宇皆造於妙

聖朝名畫評

克明工畫山水採擷諸家之美參成一藝之精團扇臥屏尤長小景但矜其巧密殊乏飄逸之致

圖畫見聞志

仁宗即位方十歲章獻明肅太后臨朝命儒臣馮章靖

元孫宣公奭宋宣獻綬等采撫歷代君臣事迹爲觀文
覽古一書祖宗故事爲三朝寶訓十卷每卷十事又纂
郊祀儀仗爲鹵簿圖三十卷詔翰林待詔高克明等繪
畫之極爲精妙叙事於左令傅姆輩日夕侍上展玩之
王明清揮麈後錄

王端

王端字子正瓘子善丹青長於傳寫及山水花竹等寫
真廟御容無及之者勅入圖畫院讓而不受止乞國子

監書各一部上嘉之特授奉職轉右班殿直

聖朝名畫

評

王端山水專學關同得其要者惟劉永與端耳

圖畫見

間志

王端學關仝人物益入俗

米芾畫史

陳用志

圖畫見間志作陳用智事實類苑作用之

陳用志許州鄆城人天聖中爲圖畫院祇候景祐初上

營慈孝寺勅用志及待詔等筆東殿御座側其間王華

希宮中別賜幘上爲龍水飾以花竹用志不樂因私遁
去人間多求用志畫日走於門用志但以半幅紙絹信
筆自適故其迹甚少

聖朝名畫評

用智工畫佛道人馬山川林木精詳巧贍但意務周勤
格乏清致居小窯鎮多謂之小窯陳

圖畫見聞志

宋澥

宋澥字則未聞長安人故樞密湜之弟司封道之從祖
也姿度高潔不樂從仕圖書之外無所嬰心善畫山水

林石凝神遐想與物冥通遇興登樓有時操筆故人間
不多見其蹟有煙嵐曉景奔灘怪石等圖傳於世圖畫
見間志

宋道

宋道字公達洛陽人以進士擢第爲郎善畫山水閒淡
簡遠取重於時但乘興即寓意非求售也故傳於世者
絕少宣和畫譜

宋迪

宋迪字復古道之弟以進士擢第爲郎山水師李成又喜畫松或高或偃或孤或雙以至於千萬株森森然殊可駭

畫史會要

宋復古山川草木妙絕一時

東坡集

度支員外郎宋迪工畫尤善爲平遠山水其得意者有平沙鴈落遠浦帆歸山市晴嵐江天暮雪洞庭秋月瀟湘夜雨煙寺晚鐘魚邨落照謂之八景好事者多傳之往歲小窰村陳用之善畫迪見其畫山水謂用之曰汝

畫信工但小失趣用之深伏其言曰常患其不及古人者正在於此迪曰此難耳女先當求一敗牆張絹素記倚之敗牆之上朝夕觀之觀之既久隔素見敗牆之上高卑曲折皆成山水之象心存目想高者爲山下者爲水坎者爲谷缺者爲澗顯者爲近晦者爲遠神領意造恍然見其有人禽草木飛動往來之象了然在目則隨意命筆默以神會自然皆天就不類人爲是謂畫筆用之自此畫格日進

江少虞皇朝事實類苑

李瑋

李瑋字公昭錢塘人

見書家傳

尚仁宗女充國公主

宋史本傳

瑋善作水墨畫時時寓興興闌輒棄去不欲人聞知以是傳世者絕少

宣和畫譜

任從一

任從一京師人仁宗朝爲翰林待詔工畫龍水海魚爲

時推賞

圖畫見閩志

裴文觀

裴文暉京師人仁宗朝爲翰林待詔工畫水牛骨氣老
重刷渲謹密亦一代之佳手也

圖畫見聞志

隋唐而下畫牛者止三人戴嵩厲歸真與裴文暉也

聖朝名畫評

胡九齡

胡九齡絳人工畫水牛筆弱於裴而意特瀟灑愛作臨
水倒影牛人多稱之

圖畫見聞志

韓琦觀胡九齡員外畫牛詩云絳臺胡掾文章外偏向

畫牛其好酷海內馳名三十年得者珍藏過金玉

韓琦

安陽集

孟顯

孟顯字坦之華池人畫佛像人物車馬等出於已意自成一家筆無少滯轉動飄逸觀者不能窮其來去之迹
聖朝名畫評

孟顯多謂之小孟亦云紅樓孟家

圖畫見閩志

關東小孟人謂之今吳生以壁畫筆上絹素一一如刀

劃道子界墨訖則去弟子裝之色蓋本筆再添而成唯
恐失真故齊如劃小孟遂只見壁畫不見其真至於點
睛皆用濃墨愈光愈失神彩不活又畫人面耳邊地闊
口鼻眼相近武宗元亦然 米芾畫史

陳士元

陳士元京師人初名允喜丹青之學尤好王士元筆遂
改其名至於屋宇亭榭闌楯車騎子女阜隸及人家景
物若太湖石芭蕉花之類皆如王士元之跡 聖朝名畫

評

葉進成

葉進成江南人工畫人物嘗見楊褒虞曹家醉道士圖
頗得閭令之體

圖畫見聞志

葉仁遇

葉仁遇進成族弟工畫人物多狀江表市肆風俗田家
人物

圖畫見聞志

唐紫微家有仁遇維揚春市圖狀其土俗繁浩貨殖相

委往來疾緩之態至於春色駘蕩花光互照深得淮楚之勝

聖朝名畫評

紀真

紀真工畫山水學范寬逼真

圖畫見聞志

黃懷玉

黃懷玉華原人有足疾時人目爲跛子學范中正畫山

水頗得其格

聖朝名畫評

商訓

商訓工畫山水亦學范寬但皴淡山石圖寫林木皆不及紀與黃也

圖畫見聞志

商訓善鼓琵琶學關仝山水頗爲切近

聖朝名畫評

丘訥

丘訥河南雒陽人工畫山水體近許道寧筆氣不逮而用墨過之

圖畫見聞志

郝銑

郝銑不知何許人工畫山水人或稱之而未見其蹟

圖

畫見聞志

董贊

董贊潁川長社人工畫山水寒林學志精勤豪峰老硬
但器類近俗格致非高

圖畫見聞志

侯封

侯封邠人爲圖畫院學生工畫山水寒林始學許道寧
不能踐其老格然而筆墨調順自成一體亦郭熙之亞

圖畫見聞志

符道隱

符道隱長安人工畫山水寒林學無師法多從已見當其合作亦有可觀

圖畫見閭志

郝澄

郝澄字長源江寧句容人世爲右族至澄以丹青自樂不事貨產人多求澄畫者賴以資給於佛道鬼神尤長聖朝名畫評

郝澄學通相術精於傳寫

圖畫見閭志

武洞清

武洞清長沙人工畫佛道人物特爲精妙有雜功德十
一曜二十八宿十二真人等像傳於世

圖畫見聞志

洞清最長於天神道釋等像布置落墨廣狹大小橫斜
曲直莫不合度而坐作進退向背俯仰皆有思致尤得
人物名獲譽於一時至有市廛人以畫刻石著洞清姓
名而求售者

宣和畫譜

毛文昌

毛文昌字則之蜀中人好畫郊野村堡人物能與真逼
又爲村童入學圖其行步動止拜立誦寫備其風槩聖
朝名畫評

尹質

尹質字化元成都人攻寫貌善佛像尤精於真人藥王
凡伎藝倡優人所識者質皆能畫之無分毫異處燕共
肅王召質寫真特優禮之聖朝名畫評

歐陽𩇑

歐陽黶京師人工傳寫宗侯貴戚多所延請其藝與僧
維真相抗無出其右者

圖畫見聞志

支選

支選不知何處人仁宗朝爲圖畫院祇候工畫太平車
及江州車又畫酒肆邊絞縛樓子有分疎界畫之功兼
工雜畫

圖畫見聞志

梁忠信

梁忠信京師人仁宗朝爲圖畫院祇候工畫山水體近

高克明而筆墨差嫩又寺宇過盛棧道兼繁人或譏之
也圖畫見聞志

來松

來松仁宗時人

歐陽修月石硯屏歌序云張景山在虢州命

治石橋小板一石中有月形石色紫而月白月中有樹森
森然其文黑而枝葉老勁雖世之工畫者不能爲景山
留以遺予予令善畫工來松寫以爲圖

歐陽文忠公集

孫仲方

孫仲方仁宗時人梅堯臣得孫仲方畫美人詩云因觀壁間

畫筆妙仍奇絕宛陵集

郭熙

郭熙河南溫人爲御書院藝學畫山水寒林施爲巧瞻
位置淵深雖復學慕營丘亦能自放胸臆巨障高壁多
多益壯今之世爲獨絕矣圖畫見聞志

熙於高堂素壁放手作長松巨木回溪斷崖巖岫巉絕
峰巒秀起雲煙變滅晝靄之間千態萬狀論者謂獨步

一時宣和畫譜

蒲永昇

蒲永昇成都人性嗜酒放浪善畫水人或以勢力使之則嘻笑舍去遇其欲畫不擇貴賤蘇子瞻內翰嘗得永昇畫二十四幅每觀之則陰風襲人毛髮爲立子瞻在黃州臨臯亭乘興書數百言寄成都僧惟簡具述其妙謂董戚之流爲死水耳

圖畫見聞志

郭元方

郭元方字子正京師人官至內殿承制善畫草蟲備究
蜚蠊潛分造化宜矜妙藝藹播佳名然而著意者不及
疎略蓋或點綴過當翻爲失真圖畫見聞志

李延之

李延之喜畫魚蟲草木得詩人之風雅寫生尤工官至

右班殿直宣和畫譜

崔白

崔白字子西濠梁人工畫花竹翎毛體製清贍雖以敗

荷鳬鴈得名然於佛道鬼神山林人獸無不精絕凡臨
素多不用朽復能不假直尺界筆爲長絃挺刃熙寧初
命與艾宣丁貺葛守昌畫垂拱殿御宸鶴竹各一扇而
白爲首出後恩補圖畫院藝學白自以性疎闊度不能
執事固辭之圖畫見聞志

崔慤

崔慤字子中白之弟也爲左廷直工畫花竹翎毛狀物

布景與白相類

圖畫見聞志

崔慤尤善作兔自成一家

宣和畫譜

吳元瑜

吳元瑜字公器京師人畫學崔白能變世俗之氣所謂
院體者故其筆特出衆工之上自成一家累官武功大

夫合州團練使

宣和畫譜

艾宣

艾宣鍾陵人工畫花竹翎毛孤標高致別是風規敗草

荒榛尤長野趣鵲鴉一種特見精絕

圖畫見聞志

艾宣畫翎毛花竹爲近歲之冠既老筆跡尤奇雖不復
精勻而氣格不凡

東坡集

李祐 丁貺

李祐河內人丁貺濠梁人皆工畫花竹翎毛各有所長
求之才格難乎其人也

圖畫見聞志

葛守昌

葛守昌京師人爲圖畫院祇候工畫花竹翎毛兼長草

蟲蔬果

圖畫見聞志

李吉

李吉開封人嘗爲畫院藝學工畫花鳥學黃氏

圖繪寶

鑑

李元濟

李元濟太原人工畫佛道人物精於吳筆熙寧中召畫相國寺壁與崔白爲勅敵議者以元濟學遵師法不妄落筆遂推之爲第一

圖畫見聞志

勾龍爽

勾龍爽蜀中人好丹青神宗時爲圖畫院祇候善作中
古人物其狀質野有返樸之意

聖朝名畫評

勾龍爽工畫佛道人物善爲古體衣冠精裁密緻亦一
代之奇筆也

圖畫見聞志

勾龍爽尤善嬰孩得其態度

圖繪寶鑑

侯文慶

侯文慶京師人爲翰林待詔工草蟲及寫蔬菜體尚精

謹殊乏生氣

圖畫見聞志

董祥

董祥京師人爲翰林待詔工畫花木有琉璃瓶中雜花折枝人多愛之

圖畫見聞志

鍾文秀

董文秀京師人爲翰林待詔工畫佛道人物兼學關仝

山水有功

圖畫見聞志

田景

田景慶陽人工畫人物有奇思嘗得一扇面畫三教作

二童奕碁於僧前一則乘勝而矜誇一則敗北而悔沮
僧臨視而笑瞻顧如生惜景孤貧聲聞不顯後之陳留
不知所終

圖畫見聞志

王易

王易鄜州人亦工畫佛道人物學鄰元濟時同畫相國

寺壁

圖畫見聞志

陳坦

陳坦晉陽人工畫佛道人物都下奉先普安二佛刹尤

多功德牆壁相國寺北廊高僧乃坦所畫其於田家固
爲獨步有村醫村學田家娶婦村落祀神移居豐社等
圖傳於世 圖畫見聞志

閻士安

閻士安宛丘人習醫術善爲墨竹及草樹荆棘土石蒼
蟹燕子等皆不用彩繪爲時輩所推王冀公德用好蓄
花竹之畫士安獻墨竹一圖甚是稱賞奏爲試四門助
教士安之竹千怪萬狀有帶風煙雨雪之勢者尤盡其

景 聖朝名畫評

士安墨竹筆力老勁名著當時每於大卷高壁爲不盡
景或爲風勢甚有意趣 圖畫見聞志

徐易

徐易海州人畫魚兼工雜畫 畫史會要

徐白

徐白易弟亦畫魚 畫史會要

徐皐

徐臯乃白之族工魚

圖繪寶鑑

江惟清

江惟清工佛道人馬

圖繪寶鑑

張宗古

張宗古工山水

圖繪寶鑑

何霸

何霸不知何許人工畫船水其名尤著有瀟湘逢故人

舶客等圖傳於世

圖畫見聞志

張經一作涇

張經姑蘇人善雜畫尤精傳模

圖畫見聞志

鄧隱

鄧隱梓州人工雜畫兼佛像鬼神本州州宅有畫天王壁并牛頭寺畫羅漢皆妙又有山水花鳥傳於世

圖畫

見聞志

趙裔

趙裔不知何許人工雜畫兼長佛道人物學朱絲用筆

少亞而傅彩爲精

圖畫見聞志

徐友

徐友

楊誠齋集云吉州人

於太平寺壁畫清濟貫河一筆紆遶長

數十丈不斷却立而觀濤瀾洶涌目爲之眩仰首近之

凜然若飛流之濺於面也

費衮梁溪漫志

楊萬里太平寺水詩云太平古寺劫灰餘夕陽雅照一

塔孤偶逢老僧聽僧話道是壁間留古畫徐生絕筆今

百年祖師相傳妙天下壁如雪色一丈許徐生畫水纔

盈堵橫看側看只麼是分明是畫不是水中有清濟一
線波橫貫萬里濁浪之黃河雷奔電卷儘巨猛獨清元
自不隨他波痕盡處忽掀怒攪動一河秋水暮分明是
水纔是畫老眼向來元自誤

楊萬里誠齋集

宋永錫

宋永錫蜀人畫花竹禽鳥魚蝦學梁廣善傳色

宣和畫

譜

趙克夔

趙克衷

宗宗室

戲弄筆墨畫游魚盡浮沉之態官止右衛大

將軍漳州團練使累贈保康軍節度使追封高密侯

宣

和畫譜

趙叔讎

趙叔讎

宗宗室

善畫多得意於禽魚下筆皆默合詩人句法

或鋪張圖繪間景物雖少而意常多官至濮州防禦使

贈少師

宣和畫譜

劉寀

劉宋字道源少時流寓都下狂逸不事事放意詩酒間
亦能爲長短句與貴游俠少相從無虛日善畫魚深得
戲廣浮深相忘於江湖之意爲士人所推譽漂泊不得
志曳裾侯門一夕大雪擁九衢闔戶不出後數日友生
候之意其僵仆矣因大叫出戶謂友生曰我阻雪不死
擁褐壞屋下無所爲得封事一通可獻天子或有遇合
同輩皆笑之俄上所陳事神考加歎而官之歷任州縣
令爲朝奉郎

宣和畫譜

高洵

高洵京師人工山水師高克明尤長於湖石以畫院多學克明故洵晚年復師范寬

畫繼

何淵

何淵在圖畫院不知何處人專師克明往往逼真然失之繁碎也

畫繼

馮曠

馮曠河內人工畫山水體製不類前人自成一家設色

蒼老峰巒秀潤馳名於熙寧間畫鵲精神態度曲盡其妙何瑋懷慶府志

胡錫

胡錫錢塘人熙豐間以畫道釋像得名 圖畫寶鑑

臺亭

臺亭夏縣人工畫元豐中朝廷修景靈宮調天下畫工詣京師選試其優者待詔翰林畀以官祿亭名第一以父老固辭歸養閭里賢之 宋史本傳

何充

何充秀才不知何許人能寫貌坡有贈詩云問君何苦
寫我真君言好之聊自適

畫繼

元豐二年春揚州新學成而陳成肅公薨州人以幣如
吳使畫者何充圖公之像設於經史閣朔望行禮如先
師云

孔武仲清江集

王可訓

王可訓京西人熙豐待詔也工山水自成一家曾作瀟

湘夜雨圖 畫繼

田和

田和陝人學李成意韻深遠筆墨精簡熙豐間罕能及者 畫繼

司馬光

司馬光字君實陝州夏縣人 見書家傳 尚書左僕射兼門下

侍郎謚文正 宋史本傳

司馬公嘗寫山水小景酷倣李思訓余家有其獨樂園

圖張即之題語云公自作驗楮色墨采與其格度果非
南渡以後物

紫桃軒雜綴

蔡襄

蔡襄字君謨興化仙遊人

見書家傳

爲端明殿學士謚忠惠

宋史本傳

君謨工於書畫頗自惜不妄爲人作

歐陽文忠公集

蔡襄後世咸不稱其善畫豈爲書名所掩邪

徐勣閩畫

記

王安石

王安石字介甫撫州臨川人

見書家傳

中書門下平章事加尚

書左僕射謚曰文

宋史本傳

王安石山水一小紙幅極工緻全法李昭道後趙千里

酷似之上作十餘本柏點葉如針杪許柏身拳曲纏糾

極諸巧態下寫古桂十餘本俱精極而多間以大枯株

獨寫人物則人俱矮面俱大款題曰皇祐壬辰王安石

寫天香深處

詹景鳳東圖玄覽文筆疑後人僞爲姑存之以廣異聞

按款題不類安石

文同

文同字與可梓州梓潼人

見書家傳

善畫竹初不自貴重四

方之人持縑素請者足相躡於門同厭之投縑於地罵

曰吾將以爲韞

宋史本傳

文同墨竹富瀟灑之姿逼檀欒之秀疑風可動不筍而
成者也復愛於素屏高壁狀枯槎老枿風旨簡重識者
所多

圖畫見閬志

昔時與可墨竹見精練良紙輒奮筆揮灑不能自已坐

客爭奪持去與可亦不甚惜後來見人設置筆研即逡
巡避去人就求索至終歲不可得或問其故與可曰吾
乃者學道未至意有所不適而無所遣之故一發於墨
竹是病也今吾病良已可若何

東坡集

文湖州晚靄橫卷瀟灑大似王摩詰而工夫不減關同

山谷集

與可亦善山水

畫史會要

蘇軾

蘇軾字子瞻眉州眉山人士自號東坡居士

見書家傳

官至端

明殿翰林侍讀學士禮部尚書謚文忠

宋史本傳

米芾云子瞻作墨竹從地一直起至頂余問何不逐節
分曰竹生時何嘗逐節生運思清拔出於文同與可自
謂與文拈一瓣香以墨深爲面淡爲背自與可始也作
成林竹甚精子瞻作枯本枝幹虬屈無端倪石皴硬亦
怪怪奇奇如其胸中蟠鬱也

米芾畫史

東坡居士作枯槎壽木叢篠斷山筆力跌宕於風煙無

人之境 山谷集

子瞻作寒林嘗以書告王定國曰予近畫得寒林已入
神品蘭陵胡世將家收所畫蟹瑣屑毛介曲隈芒縷無
不備具 畫繼

釋德洪題東坡畫應身彌勒云東坡居士游戲翰墨作
大佛事如春形容藻飾萬象又爲無聲之語致此大士
於幅紙之間筆法奇古遂妙天下殆希世之珍瑞圖之
寶相傳始作以寄少游卿上人得於少游之家二老流

落萬里而妙觀逸想寄寓如此可以想見其爲人石門

文字禪

東坡曾以蔗滓畫石

王沂竹亭集

蘇過

蘇過字叔黨坡公之季子也元祐中公知杭州叔黨年十九預計偕七年公爲兵部尚書任承務郎後公謫英州貶儋州移廉永二州叔黨皆侍行叔父樂城公每稱其孝禁錮三十年晚除中山倅而卒善作怪石叢篠咄

咄逼翁坡有觀過所作木石竹三絕以爲老可能爲竹
寫真小坡解與竹傳神者是也晁以道誌其墓亦云書
畫之勝克肖其先人又時出新意作山水遠水多紋依
巖多屋木皆人跡絕處並以焦墨爲之此出奇也

畫繼

李公麟

李公麟字伯時舒州人第進士爲中書門下後省刪定
官元符三年歸老於龍眠山雅善畫自作山莊圖爲世
寶傳寫人物尤精識者以爲顧凱之張僧繇之亞

宋史

本傳

龍眠居士雅好畫心通意徹直造玄妙士大夫以謂鞍馬愈於韓幹佛像可進吳道玄山水似李思訓人物似韓滉非過論也

李廌畫品

公麟給事博學精識用意至到凡目所覩即領其要始學顧陸與僧繇道元及前世名手佳本乃集衆善以爲己有更自立意專爲一家尤工人物能分別狀貌使人望而知其廊廟館閣山林草野閭閻臧獲臺輿阜隸至

於動作態度顰伸俯仰小大美惡與夫東西南北之人
才分點畫尊卑貴賤咸有區別非若世俗畫工混爲一
律大抵公麟以立意爲先布置緣飾爲次其成染精綴
俗工或可學焉至率略簡易處則終不可近也

宣和畫

譜

伯時留意畫馬每欲畫必觀羣馬以盡變態有僧勸其
不如畫佛後遂絕筆

鶴山集

龍眠居士嘗作長帶觀音其紳甚長過一身有半又爲

呂吉甫作石上臥觀音蓋前此所未見者又畫自在觀音跏趺合爪而具自在之相曰世以破坐爲自在自在在心不在相也乃知高人達士縱施橫設無施而不可者畫繼

公麟作畫多不設色獨用澄心堂紙爲之惟臨摹古畫用絹素著色筆法如雲行水流有起倒

圖繪寶鑑

王詵

王詵字晉卿太原人能詩善畫尚英宗女蜀國公主爲

利州防禦使 宋史本傳

王詵雖在戚里攘去膏粱黜遠聲色從事於書畫作寶
繪堂於私第之東以蓄其所有東坡爲之記其所畫山
水學李成皴法以金碌爲之似古今觀音寶陀山狀小
景亦墨作平遠皆李成法也故東坡謂晉卿得破墨三
昧 畫繼

晉卿以尚主之貴日在綺羅絃管之間而濡豪嬉戲乃
皆風塵表物非其胸中自有丘壑何以及此 鄒浩道鄉

集

王詵學李成山水清潤可愛又作著色山水師唐李將軍不古不今自成一家畫墨竹師文湖州

圖繪寶鑑

蔡肇

蔡肇字天啓潤州丹陽人初事王安石見器重又從蘇軾游聲譽益顯第進士元祐中爲太學正張商英當國引爲禮部員外進起居郎拜中書舍人罷爲顯謨閣待

制知明州

宋史本傳

蔡天啓中書集中有跋畫一段云余官京師十五年日
有數澤之思偶得尺素作平岡老木以其餘地授伯時
請加速水歸鴈以扁舟載僕因題詩其左曰鴻鴈歸來
水拍天平岡老木尚寒煙付君餘地安漁艇乞我春江
聽雨眠伯時唯唯然懶不能竟他日彥舟取去以示令
戩即取筆點染如詩明年冬余補常倅歸過彥舟壁間
見頗有佳思初夏泛小舟至村舍歸沂珥瀆河至十八
里店遇雨宿橫塘埭下閉臥蓬中夜分不寐聞歸鴈聲

因記曩時復作絕句云平野風煙入夢思殷勤作畫更
題詩扁舟臥聽橫塘雨恰值江南歸鴈時自作詩畫至
今六年而竟踐之念曠蕩之可樂悼歲月之不留於是
悵然者甚久舟過丹陽宿北山僧舍因書以遺令戩且
寄彥舟以跋前畫云

劉宰漫塘集

李植

李植字化光京兆人觀察使士衡之孫自少年好道不
樂婚宦自放田野往來關中洛陽汝州人以爲有道之

士也劉貢父過寶應僧舍與昭禪師者語壁有畫山水
極妙昭語貢父乃化光所畫貢父率然贊之曰昆侖有
名瑤池非實在夢暫覲觀幻旋失惟是墨妙半壁蕭瑟
崎嶇坎壈雲舒川疾是心中象非筆端物大士觀化四
海一室 王銍默記

晁補之

晁補之字无咎濟州鉅野人 見書家傳官至禮部郎中出知

河中府 宋史本傳

補之有自畫山水留春堂大屏上題云胸中正可吞雲

夢盞裏何妨對聖賢有意清秋入衡霍爲君無盡寫江

天又題自畫山水寄人云虎觀他年清汗手白頭田畝

未能閑自嫌麥壠無佳思戲作南齋百里山陳無已獨

愛重其蹟亦嘗詠其扇云前身阮始平今代王摩詰偃

屈蓋代氣萬里入咫尺又嘗增添蓮社圖樣自以意先

爲山石位置向背作粉本以授畫史孟仲寧今傳模之

菩薩做侯昱雲氣做吳道玄天王松石做關同堂殿草

樹倣周昉郭忠恕臥槎垂藤倣李成崖壁瘦木倣許道
寧湍流山嶺騎從韃服倣魏賢馬以韓幹虎以包鼎猿
猴鹿以易元吉鶴白鷗若鳥鼠以崔白集彼衆長共成
勝事今人家往往摹臨其本

畫繼

晁无咎閑居濟州金鄉葺東臯歸去來園樓觀堂亭位
置極瀟灑盡用陶語名之自畫爲大圖書記其上書尤
妙

耆舊續聞

晁說之

鼎說之字以道少慕司馬溫公之爲人自號景迂未三十東坡以著述科薦之靖康初自休致中召爲著作郎後試中書舍人兼東宮詹事建炎初以待制侍讀而終山谷嘗題其雪鴈云飛雪灑蘆如銀箭前鴈驚飛後回盼憑誰說與謝元暉休道澄江靜如練又无咎題四弟橫軸畫云黃葉滿青山枯蒲淨寒水鳬鴈下陂塍牛羊散墟里擔穫暮來歸兒迎婦窺籬虎頭無骨相田野有餘思

畫繼

趙令穰

趙令穰字大年官光州防禦使雅有美才高行讀書能
文少年誦杜甫詩見唐人畢宏韋偃志求其蹟師而寫
之不歲月間便能逼真其所作多小軸甚清麗雪景類
王維筆汀渚水鳥有江湖意每出一圖人或戲之曰此
必朝陵一番回矣蓋譏其不能遠適所見止京洛間景
不出五百里內故也

畫繼

大年學東坡先生作小山叢竹殊有思致

山谷集

趙令松

趙令松字永年大年弟亦善丹青淳休居士謝大年江
天晚景圖雜言云神妙獨數李將軍安知伯仲非前身
畫繼

黃庭堅題永年畫云調麝煤作花果株難工永年遂臻
此殊不易又云永年作狗意態殊逼山谷集

趙令駿

趙令駿字景升封嘉國公師李伯時善畫馬
圖繪寶鑑

趙叔盎

趙叔盎字伯充善畫馬嘗以其藝并詩投東坡東坡次其韻云天驥德力備馬外龍麟中皇天不遣言兀與畫圖同駕駘飽官粟未受一洗空十駕均一至何事籛雲風畫繼

趙士暕

趙士暕字明發讀書能文元符初試宗室藝業合格者八人獨明發賜進士出身兼工畫藝

畫繼

陳師道題明發高軒過圖云今代風流數大年含毫落
筆開山川忽忘朽老壓塵底却怪鳬鴻墮目前爾來八
二復秀出注云八二當是明發行第萬里河山才咫尺眼前安得有
突兀復似天地初開闢明窗寫出高軒過便逐愈湜同
吟哦晚知書畫真有益却悔歲月來無多任淵陳后山

詩注

張敦禮

張敦禮汴梁人哲宗壻也畫人物樹石並倣顧陸筆法

緊細神采如生贈太師圖繪寶鑑

張舜民

張舜民字芸叟號浮休居士紹聖入黨貶均州紹興初
追復直學士生平嗜畫題評精確雖南遷羈旅中每所
經從必搜訪題識東南士大夫家所藏名器悉載錄中
亦能自作山水有自題扇詩云忽忽南遷不記年二妃
祠外橘州前眼昏筆戰誰能畫無奈霜紈似月圓又題
鄧正字家劉明復秋景末句云我有故山常自寫免教

魂夢落天涯

畫繼

劉明復

劉明復

名忱見馮山太師集

善畫山水師李成官至直龍圖閣圖

繪寶鑑

馮山求劉忱明復龍圖爲畫山水詩云晉唐諸公重小
筆高價直與才名俱然多華丹少泉石清格往往人間
無至今百存無一二存者真僞難分區營丘李成稱絕
跡峰巖秀拔非常模穉之灑落亦其亞玉堂屏上瀟湘

圖董屈許凡數輩隱隱俗氣藏肌膚乃知山水係絕

品筆墨造化非功夫要之文章之緒餘世上真巧歸吾

儒益昌臺府少文字見性文空談毗盧龍門雪景生坐

隅山潛水奧爭奔趨倚空直幹鬬孤聳緣險古道盤縈

紆擁衲禪僧對寂寞攜琴朝士來崎嶇主人肆筆聊自

娛新言默與天機符公家清白傳數世經濟滿腹冰霜

壺一言不用輒掉臂五年蜀使甘馳驅時將素毫寫胸

臆寧復意外分精粗復古雖許格復古有許道寧格疑其學許也與可

亦壯非燕徒

文與可學燕穆之然未至也

豈如公思

去

脫羈束破碎

嵩華傾江湖窮冬從公熟窺看愛重不覺聲嗟吁靈峰

北苑助蕭爽雪不到地風號枯平生好畫已成僻寧借

不喜臨與摹出公門下見公筆有類海客遺明珠願公

乘興一揮灑束絹數幅光芬數異時解組還故廬皎潔

將伴林泉軀

馮山太師集

蔣長源

蔣長源字永仲官至大夫作著色山水山頂似荆浩松

身似李成葉取真松爲之如靈鼠尾大有生意石不甚
工作凌霄花纏松亦佳

畫繼

李甲

李甲字景元自號華亭逸人作逸筆翎毛有意外趣

畫繼

繼

東坡以李甲比郭恕先善畫而有文

周少隱竹坡詩話

李世南

李世南字唐臣安肅人明經及第終大理寺丞嘗與晁

无咎同試諸生无咎有求橫幅長篇又有題扇詩蓋長
於山水也東坡亦嘗題其秋景平遠云人間斤斧日創
夷果見龍蛇百尺姿不是溪山曾獨往何人解作挂猿
枝野水參差落漲痕疎林敝倒出霜根浩歌一棹歸何
處家在江南黃葉村予嘗見其孫皓云此圖本寒林障
分作兩軸前三幅盡寒林坡所以有龍蛇姿之句後三
幅盡平遠所以有黃葉村之句其實一景而坡作兩意
又浩歌字雕本皆以爲扁舟其實畫一舟子張頤鼓枻

作浩歌之態今作扁舟甚無謂也

畫繼

李皓

李皓字雲叟唐臣孫避亂入蜀居成都其所作山水取前輩成樣合而爲一故能美觀一時翕然稱之

畫繼

趙宗閔

趙宗閔爲尚書郎山谷載銅官僧舍墨竹一枝筆勢妙天下爲作小詩云省郎潦倒今何處敗壁風生雙竹枝滿世閤劉專翰墨誰爲真賞拂蛛絲又云獨來野寺無

人識故作寒崖雪壓枝想得平生藏妙手只今猶在鬚

成絲畫繼

章友直

章友直字伯益

見書家傳

善畫龜蛇以篆筆畫亦有意又能

以篆筆畫棋盤筆筆相似米芾畫史

文勛

文勛字安國元祐末作太府寺丞福建漕東坡跋其畫扇云道子畫西方變相觀者如堵作佛圓光風落電轉

一揮而成嘗疑其不然今觀安國作方界略不杼思乃知傳者之不謬

畫繼

劉延世

劉延世公是先生之猶子少有盛名元祐初游太學築堂業講名曰抱甕嘗作墨竹題詩云酷愛此君心常將墨點真毫端雖在手難寫淡精神又云靜室焚香盤膝坐長廊看畫散衣行趣尚之高如此

畫繼

李頎

李頌字粹老少舉進士當得官棄去烏巾裘爲道人遍
歷湖湘間晚樂吳中山水之勝遂隱於臨安大滌洞天
往來苕溪之上遇名人勝士必與周旋素善丹青而間
作小詩東坡倅錢塘日粹老以幅絹作春山橫軸且書
一詩其後不通姓名付樵者令俟坡之出投之坡展視
詩畫蓋已奇之矣及問樵者誰遣汝也曰負新出市始
經公門有一道人與我百錢令我呈此實不知何人也
坡益驚異之即散問西湖名僧輩云是粹老久之偶會

於湖山僧居相得甚喜坡因和其詩云詩句對君難出
手雲泉勸我早抽身

春渚記聞

陳偕

陳偕淮南廣陵人見古今畫雖敝縑裂素未嘗不學一
不可於意輒復易之舐筆濡毫欣然忘勞

秦觀淮海集

陳直躬

陳直躬偕子世其學

淮海集

蘇軾題陳直躬畫鴈詩云野鴈見人時未起意先改君

從何處看得此無人態

東坡集

朱象先

朱象先字景初松陵人馳名紹聖元符間坡跋其畫云
能文而不求舉善畫而不求售文以達吾心畫以適吾
意而已以其不求售也故得之自然世亦罕見不知其
所長也

畫繼

朱象先少時畫筆常恨無前人深遠潤澤之趣一日於
鵞溪絹上作小山覺不如意急湔去之故墨再三揮染

即有悟見自後作畫多再滌去或以細石磨絹要令墨色著入絹縷

春渚紀聞

寇君玉

寇君玉工蟹

圖繪寶鑑

文同畫厨十詠有題寇君玉郎中大蟹云蟹性最難圖生意在螯蛭伊人得之妙郭索不能已

丹淵集

郭煥

郭煥

與文同同時

文同捕魚圖記云幽有郭煥者善搨寫余亦

令爲之郭之於畫有尺寸甚可愛與余爲此尤盡其所

學 丹淵集

劉繼勲

劉繼勲爲左藏庫使知寧州善畫 丹淵集

張敏行

張敏行彭州人俊慧通博善畫 丹淵集

許中正

許中正蜀人工鬼神及龍 圖繪寶鑑

晁補之題許中正捕龍雷詩云彼龍胡爲被天謫不肯
爲天行雨澤天勅雷公恣搜索龍藏何所忽爾獲提之
滿空若曳帛電風電火相卷射雷張兩翅但拍拍首尾
挽之足雙磔龍力與雷固不敵雷轉威怒龍褫魄須臾
定見肝胃折萬力千氣凡幾畫斯人斯品入神格

集

丹淵

黃斌老

黃斌老潼川府安泰人文湖州之妻姪也登科嘗任戎

倅適山谷貶戎州與定交且通譜善畫竹山谷有詠其
橫竹詩又謝斌老送墨竹十二韻云吾子學湖州師逸
功已倍預知更入神後出遂無對

畫繼

黃子舟

黃彛字子舟斌老弟其名字初非彛與子舟也山谷以
其尚氣故取二器以規之自後折節爲粹君子終朝郎
郡倅山谷用贈斌老韻謝子舟爲余作風雨竹兩篇前
篇云歲寒十三本與可可追配後篇云森削一山竹北

壯十三輩誰言湖州沒筆力今尚在而與可每言所作
不及子舟畫繼

劉明仲

劉明仲善作竹畫繼

黃庭堅劉明仲墨竹賦云子劉子山川之英骨毛粹清
用意風塵之表如秋高月明游戲翰墨龍蛇起陸嘗其

餘巧顧作二竹山谷外集

黃與迪

黃與迪善墨竹山谷次韻謝與迪所作竹五幅云吾宗
墨修竹心手不自知但不知爲何人任子淵詩注亦不
及之畫繼

楊吉老

楊吉老文潛甥文潛嘗云吾甥楊吉老本不好畫竹一
旦頓解便有作者風氣揮灑奮迅初不經意森然已成
愜可人意其法有未具而生意超然矣无咎亦有贈文
潛甥克一學與可畫竹詩克一吉老字也畫繼

陳修已

陳修已通城人元祐八年爲智嵩上座寫晦堂老師絕妙諸本

山谷集

馬賁

馬賁河中人長於小景作百鴈百猿百馬百牛百羊百鹿圖雖極繁夥而位置不亂本佛像馬家後寫生馳名

於元祐紹聖間

畫繼

周曾

周曾不知何地人與馬賁同時差高於賁又長山水

繼

張無惑

張無惑山人也善畫山水浮休贈詩云西征已度故關
山秋雨霖零路屈盤受盡艱辛心不足解程又展畫圖
看畫繼

劉國用

劉國用漢州人工畫羅漢壁素之傳甚多在丘杜金水

張之下也

畫繼

陳自然

陳自然工畫佛山谷題云陳君以佛畫名京師作秋水寒禽甚可觀

畫繼

李明

李明善山水坡以其畫送吳遠遊云近李明畫山水有名頗用墨不俗輒求得一橫卷甚長可用牀上繞屏

畫繼

蔡規

蔡規建昌軍人謝無逸觀其畫山水有蔡生老江南山水涵眼界揮灑若無心筆端出萬怪之句

畫繼

雷宗道

雷宗道商州人工雜畫尤長於佛像山水雙流張庭堅家有兩橫幅人以爲郭熙也

畫繼

能仁甫

能仁甫以字行本畫院出身官至縣令長於佛像山水

世多觀音畫繼

費宗道

費宗道蔡州人來京師畫太一宮中主火神頃刻而成
衆工疾之告監牧中使曰畫太速成殊不加意中使遂
令墮毀一夕憤怒而卒

畫繼

成宗道

成宗道長安人工畫人物兼善刻石凡長安壁傳吳筆
皆臨模上石其跡細如絲髮而不失精神體段有所集

吳生三清像與左右侍衛宛如吳作或云因能勒石後轉而爲畫也又改武洞清長沙羅漢與三元皆能舍短求長自出新意過於長沙遠矣

畫繼

吉祥

吉祥平陽人工佛道筆墨輕清又能布景作佛像星辰多在山水中後人罕及山水亦佳

畫繼

李士雲

李士雲金陵人傳荆公神贈詩曰衰容一見便疑真李

氏揮毫妙入神欲去鍾山終不忍謝渠分我死前身又
善山水荆公贈古風有李子好山水而常寓城郭毫端
出窈窕心手初不著之句

畫繼

程懷立

程懷立南都人東坡作傳神記謂傳吾神爾得其全懷
立舉止如諸生蕭然有意於筆墨之外

畫繼

劉宗道

劉宗道京師人作照盆孩兒以手指影影亦相指形影

自分每作一扇必畫數百本然後出貨即日流布實恐
他人傳模之先也 畫繼

李宗晟

李宗晟作水簾圖坡題云宗晟一軸水簾圖寄與南舒
李大夫未向林泉歸得去炎天酷日且令無 畫繼

尹白

尹白汴人專工墨花坡嘗賦之云花心起墨暈春色散

毫端 畫繼

陳常

陳常江南人以飛白筆作樹石有清逸意折枝花亦有
逸氣一株以色亂點花頭意欲奪造化本朝妙工也

繼

陶縝

陶縝

金陵人

荆公有題所畫果示德逢詩所作花果精緻

可玩

畫繼

李遵易

李遵易不知何郡人无咎有跋畫魚圖甚詳

畫繼

段吉先

段吉先不知何地人晁无咎有題其小景三絕

畫繼

孟仲寧

孟仲寧

與晁說之同時

說之云白蓮社圖余自以意先爲山石

位置向背物皆作粉本以授畫史孟仲寧使摸寫潤色

之

雞肋集

劉琮

劉琮廬陵人以寫真名一時玉局老人自海上歸嘗贈以言由是士大夫益稱之

廬溪集

李漢舉

李漢舉工畫竹

圖繪寶鑑

黃庭堅題李漢舉墨竹云如蟲蝕木偶爾成文吾觀古人繪事妙處類多如此

山谷集

張大同

張大同能寫真

山谷集

張子謙

張子謙能寫真

山谷集

宋處

宋處邢州人善畫山水曾摸郭熙滿溪春溜圖

圖繪寶鑑

鑑

秦湛

秦湛字處度少游子善著色山水

圖繪寶鑑

高述

高述丹陽人學東坡書及竹石皆逼真

圖繪寶鑑

劉仲懷

劉仲懷山陰人元祐徙居諸暨善畫墨竹筆法師文湖

州

圖繪寶鑑

程坦

程坦善雜畫松竹頗佳人物甚俗米元章謂能污茶坊

酒肆者此論真是

圖繪寶鑑

妙頤真

妙頤真南陽人畫墨鬼暈淡有功山谷嘗跋之

畫史會

要

牟仲甫


牟仲甫隨州人畫猿獐猴鹿與易元吉相似湖廣多有

畫史會要

牟仲甫作雞有意趣

馮山太師集

御定佩文齋書畫譜卷五十



總校官庶吉士臣張能照

校對官庶吉士臣徐如澍

謄錄監生臣張孝基